



*I ladins ti pëta bëgn cater iadi l'ajëi al Sest, che resta cun les gaiofes ötes dan le publich de ciasa.*

Bele da cotan de partides à la formaziun da La Val chirì ince indo la devënta fora de ciasa y l'ultim fin dl'edema era garatada sön le ciamp dl Sest, apëna delibré dala nei. Do la devënta dl fin dl'edema da denant cuntra le Valdaora se presentëia i ladins te ciamp cun na marcia inplö y anuzëia bun les ocajuns por castighé a dovëi.

Le Sest mët man cun plö convinziun y drüca zeruch i ghesc da La Val. Plö de n iad manacia i atacano de jí in vantaje mo ne concretisëia nia dan porta. Le sterch capitan dl Sest fej le jüch y partësc fora bun i palês ai cumpagns. Do avëi studié jö les posiziuns di aversars anuzëia i ladins la lerch amez por tigní alt le palé y avanzé cun düta la scuadra. Al 10<sup>th</sup> la pröma gran ocajiun: Alex E. crossëia amez por Franz che röia a dërt mumënt a rebat le palé de ce, indere cuntra le pé bass de porta. Dal'atra pert ti sciampa Max al defensur y preparëia amez por Alexander, che é de püch plö inant y ne röia insciö nia ala trata. A sbloché le resultat pënsa spo le duo defensif Sottara – Dapoz: ala trata de puniziun püch dan le pröm temp crossëia Werner amez por le zentral Christian che cordinëia la trata al jore por le vantaje ladin.

**Le prüm tëmp se stlüj jö cun le vantaje dl La Val por 1 a 0.**

Al mëteman dla secunda pert pordüj i aversars apëna a fa i prüms vari te ciamp che le resultat sta bel 2-0. L'atacant Alex E. é chilò le plö asvelt y anuzëia la debla passaja dl defensur zeruch al portier por spizuré la cogura te porta. Sciöche do na duscia frëida se inciurnesc fora i sogadus de ciasa y mët man de pressé dassënn i ladins. Chësc ti gareta ince y bele al 60<sup>th</sup> röia le palé alt amesa area daulache le capitán Watschinger deviéia de ce sura le portier Sepl por le 2-1. La partida se fej tres plö interessanta y i scrais dl publich influenzëia de plëgn les dezijiuns d'arbiter jonn, che perd bel plan le control y se fej speté sót dala nervosité. Val menüt plö tert, avisa al 66<sup>th</sup> pëia ia le sogadú amez Franz sú cuntra porta y dal piz dl'area veghel na trata sëcia, a chëra che l'un dl Sest mëss se destrà por devié, l'atacant Alexander é daimpró y röia a dërt mumënt por apogé le palé te rëi. Ater co tra le flé, la partida devënta tres plö cialda y por vigni fal sciuré cuntra le Sest da pert dl mandl fosch se ciafa chësc na ciuvíra de insulc da pert dl publich y dai sogadusc instësc. La Val anuzëia chësc marcé por stlü jö la partida, al 83<sup>th</sup> menüt é indo Franz cun le palé al pé dan porta, püch daít dal'area de jüch musüra chesc sön le pé lunch de porta y fej ruvé le palé avisa ailò. A püch menüt dala fin pó sëgn i ladins trà le flé. Na devënta miritada cun en resultat tlér che respidlëia l'alenamënt miré dl'alenadú Hilber tratan l'edema passada. Indo n iade é la forza de grup stada maiú co la prestaziun dl singul y fondamentala por porté a ciasa trëi punc d'or.

**Sest – La Val : 1 - 4**

**Formaziun La Val:** 1. Sepl Kantioler, 2. Marco Sottara , 3. Werner Sottara, 4. Paolo Vallazza, 5. Christian Dapoz, 6. Michele Campei, 7. Max Nagler (dal 86<sup>^</sup> Felix Nagler), 8. Franz Tolpeit, 9. Alexander Miribung (dal 88<sup>^</sup> Martin Ploner), 10. Stefan Sottara – capitán (dal 80<sup>^</sup> Egon Frenes), 11. Alex Elzenbaumer

**Goi por La Val:** Christian D. al 42<sup>^</sup>, Alex E. al 46<sup>^</sup>, Alexander M. al 66<sup>^</sup> y Franz T. al 83<sup>^</sup>

**Proscima partida:** *La Val süga en duman sabeda ai 21 de aurì dales 16:00 te ciasa cuntra le Vinti*

**Atri resultac:**

**Juniores Pool (Mareo/La Val/Rina): Stegen – Mareo 2-1**

**Altherren (La Val): Schabs – La Val 2-1**

**U-15 (La Val): La Val – Mareo 0-4**

**U-12 (La Val): La Val – Team 4 brüm 0-8**

**U-9 (La Val): Falzes – La Val 1-0**